

野

語

野語八

伏虎道場行者編

語屑目次

西藏略

巴勒布

古佛真身

天竺

道教宗派

方士

回教

天主教

艾儒略

王豐肅

西洋歷法

習天文

附 毀西洋堂

長崎略

淡海水

烟瘴

自鳴鐘表

麒麟

鳳凰

獅

燕窩菜

葛仙米

人面豆

阿魏

椰瓢

伽南香

廣東冰

野語八

語屑

西藏略

世傳活佛在西藏卽西吐蕃唐曰烏斯國明曰烏斯藏今日伯圖特又曰唐古忒去雲南麗江府千餘里天文入井三十度四時觀北斗止見其半居萬峰之中東連滇蜀西卽青海直抵河湟通西洋達噶斯地分三部曰康卽察木多曰衛卽西藏拉撒召曰藏乃後藏札什倫布皆番僧之淵藪也其地多僧無城郭

羣居大土臺上不食肉娶妻無刑罰兵革疾病楞伽  
經至萬卷其土臺外僧有食肉娶妻者居人尙佛教  
信喇嘛風俗汚鄙人皆垢面蓬頭袒臂跣足死者用  
水火葬或割屍飼鷹犬挫骨和麪以啖鳥謂之超度  
僧俗男女莫不貪利西南諸夷及卡契回民皆傭工  
作藝其間製造金銀首飾銅鐵器皿及鑲嵌紅綠寶  
石製夷錦氍片花布諸物俱精巧日食牛羊糝粃酥  
油熬茶都有腥氣爲古來王化所不及自唐初以宗  
女文成公主嫁西吐蕃封其國主爲海西郡王始與

中國通往來其時國主曰蘇隆藏布又娶白布國王  
女爲妾唐公主好善修大小二召并築城於達布拉  
爲宮室唐蕃分界立碑誓不相犯大召前廊繪有唐  
三藏取經師徒四衆像并尉遲敬德鎮邊軍器猶存  
然考之正史名號時事互有牴牾大抵藏人自詡如  
此耳元世祖中統元年乃宋理宗景定元年也先有  
西僧八思巴今譯作帕克巴吐蕃薩斯嘉人足克衮氏謁世  
祖於潛邸言其祖朶栗赤譯作多爾濟佐國主霸西海十  
餘世世祖大悅至是尊爲國師統領釋教旣歿賜號

皇天之下一人之上宣文輔治大聖至德普覺眞智

佐國如意大寶法王西天佛子大元帝師于是西僧

之教大重至元十四年以楊連眞伽

譯作嘉木總江楊刺勒智

南釋教後遂發宋紹興諸陵毀宋故宮爲佛寺三十

年以楊髡子暗普

譯作安布

爲江浙行省左丞以民怨罷

之武宗至大元年西僧毆留守不問又以西僧教瓦

班

譯作且勒幹巴勒

爲翰林學士承旨其作會賜號寫經賜

田設官等事元代極盛順帝太子

阿裕錫哩達喇

乃曰李好

文先生教我儒書多年不曉其意今聽佛法一夜卽

曉其佞佛殆性成也至正十三年哈瑪爾進西番僧

於帝教行房中運氣術號演撲兒

譯作延徹爾

法授爲司

徒禿魯鍊木兒

譯作圖魯特穆爾

進僧伽璘眞

譯作結琳沁

善秘

密術封爲國師帝從事其術怠於政事以底於亡明

洪武初亦遣使至西域招諭於是攝帝師喃加巴藏

卜遣使朝貢六年入朝授爲熾盛佛寶國師錫玉印

其冬元帝師之後鎖南堅巴藏卜元國師哥列思監

藏巴藏卜並遣使乞玉印不允七年秋八思巴之後

請封詔授爲圓智妙覺宏教大國師烏斯藏僧爲灌



頂國師又有哈立麻者國人以其道術稱爲尙師  
十一年遣僧宗泐使西域永樂間徵哈立麻入朝命  
建普度大齋七日有卿雲甘露青烏白象之瑞封爲  
萬行具足十方最勝圓覺妙智慧善普應佑國演教  
如來大寶法王西天大善自在佛領天下釋教賜誥  
印及儀仗寶幣其徒亦封賜有差正德十年帝惑近  
習言烏斯藏僧有能知三生者國人稱活佛乃命中  
官劉允往迎臣工切諫不聽所賚珠緋犒賞鉅萬內  
庫黃金爲空所攜茶鹽數十萬計途中供頓不貲入

其地活佛匿不見番人襲奪寶貨器械以去將校死傷甚衆允僅以身免返成都以空函馳奏會武宗崩世宗召允下吏治罪嘉靖中法王猶入貢不絕有僧鎖南堅錯者知己往未來事稱活佛萬厯七年順義王俺答由瓦剌迎此僧勸通中國此僧乃貽書張居正自稱釋迦牟尼比丘由是中國亦知真有活佛矣此僧有異術能服人諸番莫不從其教卽大寶法王以下咸俯首稱弟子自是西方止知奉此僧諸番徒擁虛位而已此外番僧封貢不可勝紀中國爲之勞

弊至

國朝崇德七年

即故明崇正十五年壬子班禪達賴等謂東土有

聖人出遣使達

盛京通貢表順治間第五輩達賴喇嘛入

覲

勅賜金冊金印封承領西天佛教嗣準噶爾逆賊蹂躪藏地康熙五十九年平定

勅封康濟鼐爲貝勒阿爾布爲貝子隆布鼐爲公頗羅鼐以軍功疊封至郡王領藏事子孫世襲雍正元

年青海肆逆追逐出境五年藏地貝子謀殺貝勒

王師征討伏誅八年準噶爾復犯乃於泰寧屬之噶

達地方

距廬城數站

建惠遠廟使達賴移駐焉自是防兵

四出十三年準夷求成達賴仍回藏地

命果親王至泰寧賜宴熬茶送往安禪熬茶者卽內地齋僧也乾隆十五年藏王珠爾嗎特納木札勒弒其胞兄謀爲不軌經駐藏大臣傅拉二公以計擒誅之其頭目倉猝生變二公遇害建有雙忠祠遂

命四川總督岳公

鍾琪

領兵勦滅藏王之爵遂除其地

勅達賴喇嘛掌管設辦事噶布倫四人相之以後藏  
賜班禪額爾德尼管轄駐札什倫布距前藏千餘里  
藏人酷信佛法自改封後頗安靖四十五年班禪額  
爾德尼入

親 賜四體字玉冊玉印五十三年巴勒布野番與  
西藏講和元戎鄂 奉

命進勦松潘建昌兩鎮帶兵與噶布倫前行招致番  
目得其要領以理開諭番目咸感畏納款次年五月  
蕲功按今所謂達賴喇嘛者乃前藏所奉活佛駐錫

布達拉所謂班禪額爾德尼者乃後藏所奉活佛幼而穎異因軍務移駐大召五十九年仍回札什倫布所駐梵宮均極壯麗起居嚴肅陳設異寶奇珍瓶爐繡佛皆累朝頒賜殿宇方丈皆寶石嵌砌用巨鼎銅缸貯酥油然燈其中各禪房僧衆以千百計焚香唸經鐘鼓梵器較中華尤精好彼云達賴乃觀音大士轉世布達賴卽普陀山之謂班禪者乃世間罕有活佛能化人皆爲善云云其眞其僞莫可致詰相傳活佛生而神靈將死告其徒以託生之地手中有紋

可證其徒如命而往迎歸供奉後死亦如之故今昔所傳其名不一又聞達賴喇嘛入

朝在京痘發而死其神靈眞僞概可知矣我

國家懷柔遠人優禮保護卽以其道治其人祇用羈縻綏靖視前代之崇信其教勞弊中國眞度越萬萬矣昌黎佛骨表云假使其人至今尙在奉其國命來朝京師云云蓋設言耳不意千載之後實有此事嗚呼盛哉

巴勒布

後藏之外大西天有三百六十國不可以道里計其  
與札什倫布毗連者爲巴勒布在藏地西南舊有三  
罕一曰布顏罕住末作城一曰葉楞罕住莽哈巴哈  
城一曰庫庫木罕住吉拉蘇拉魚卡城三人撫有五  
六萬戶其北乃西藏之吉隴自古隴至藏計程二十  
三日此三罕曾於雍正年間奉

勅賞資隨遣使入貢載藏志其地天氣和暖產稻米  
孔雀金絲緞綢布棉花瓜果蔬菜如內地惟言語不  
通其番文亦與唐古忒各別帽服皆白色以布片遮



下體披髮赤足與藏民交易有無繼有科爾喀者又  
名別胖子亦邊外部落其人積勢強大將巴勒布三  
罕併吞爲一今之頭目番部稱王子名巴都爾色和  
卜年幼惟頭目噶吉等是聽因藏地噶布倫戴紉兵鎮領  
將名第巴職等交涉不循舊規加抽貨稅售鹽攬土  
而巴勒布銀錢亦成色不足起衅巴番因於乾隆戊  
申寇犯藏地平定後奏准由四川總督派員赴藏董  
理鼓鑄銀錢每枚重一錢五分文曰乾隆藏寶

古佛真身

古佛真身在錫蘭國自蘇門答刺順風十二晝夜可達翠藍嶼自此西行九日抵佛堂山始入錫蘭境海邊巖上一足跡長三尺故老云佛從翠藍嶼來踐此故存其跡中有淺水四時不涸人皆手蘸拭目洗面曰佛水山下僧寺有釋迦真身倒臥牀上旁有佛牙及舍利相傳佛涅槃處也寢座沉香爲之飾以寶石莊嚴甚至又有篤蠻山者在翠藍嶼中其人皆巢居穴處赤身髡髮相傳釋迦昔經此山浴於水或竊其袈裟佛誓云後有穿衣者必爛其皮肉自是寸布掛

身輒發瘡毒男女皆裸體但紉木葉蔽其前後故又名裸形國地不生穀惟啖魚蝦山芋波羅蜜芭蕉實之屬而已果爾則佛不免嗔之一字殊不足信其裸形者乃地氣蒸熱使然也然乎否乎

### 天竺

榜葛刺卽漢身毒國東漢曰天竺後中天竺貢於梁南天竺貢於魏至唐分五天竺又名五印度榜葛刺卽東印度也自蘇門答刺順風二十晝夜可達明永樂正德間嘗兩貢麒麟其地土沃俗淳有文字繁華

類中國王及官民皆回回人官司文移醫卜工技悉如中國甚敬天朝使者然史傳不言其國有僧佛惟榜葛刺之西有沼納樸兒者卽中印度古所稱佛國也朝貢以絕遠不至又有柔佛者地近彭亨或云卽東天竺

### 道教宗派

道家有南北二宗世傳自東華少陽君得老聃之道以授漢鍾離權權授唐進士呂巖巖一授金重陽子王嘉嘉授七弟子邱處機譚處端劉處玄王處一郝

大通馬鈺暨鈺妻孫不二嘉居寧海自題其庵曰全  
真宗其教者爲全真道士是爲北宗北宗先性嚴又  
授遼進士劉操而張伯端石泰薛道光陳抃白玉蟾  
彭杞復遞相授受是爲南宗南宗先命今道教陵夷  
黃冠者流無復能言性命者卽授受而論以漢人而  
親授唐人以唐人而親授金人曠世相逢薪傳不替  
自非其徒自言又誰聞之而誰見之乎夫天仙上真  
如吾道之先聖先賢本不世出旣已神游太虛默贊  
元化而謂其溷跡塵世親授徒侶不亦誣乎至真修

者求諸經典語錄探賾元奧精進不懈自能豁然妙悟超凡入聖正如學者沉酣經籍窮理盡性深造有得蔚爲儒宗初非先聖先賢耳提面命之也故謂王劉得呂祖之道呂祖得鍾離之道則可謂之授受吾未之敢信

### 方士

方士之言因時立異雜而多端未能動明哲之聽故假道德五千言穿鑿而傳會之以天之不可階而升也創爲乘風御氣之說以神仙之不可卽也創爲扶

鸞降筆之說以人情多貪生畏死也爲長生不死之說以人情多貪財好色也爲黃白採戰之說其他邪說不可枚舉書傳所載誕妄最著者如漢武思念李夫人卽以帳中人影誑之唐元宗思念楊太眞卽以金釵鈿盒誑之宋徽宗畏怯金兵卽以六甲神兵誑之大抵皆投世主所深願而不可得者以售其奸卒之冰月鏡花迄無成效雖技窮伏誅而爲世患已不可救藥矣至人臣之信其說者或覬覦非分或貽悞職守馴至身敗名裂濱死不悟如劉安高駢輩何代

無賢徒以服丹而藥發殞身以燒煉而傾蕩財賄猶其小焉者也然方士卽修道之流豈絕無賢哲廁於其間乎曰有眞修之士方且視富貴如敝屣安復與人家國故入山惟恐不深物色所加避之惟恐不速其或名聞世主徵聘敦迫不得已而一至闕廷亦必巽詞自悔堅求還山如唐軒轅集宋陳圖南之類是已其詭譎妖異驚世駭俗奔競權勢挾術干進者必無眞修之士

### 回教



回回教祖國名默得那相傳其初國王謨罕驀德生而神靈臣服西域諸國諸國尊爲別諳扶爾猶華言天使也有經三十本凡三千六百餘段其書旁行兼篆草楷三體其教以事天爲主無像設每日西向虔拜每歲齋戒一月謂之把齋隋開皇中其國撒哈八撒阿的幹葛思始傳其教入中國其國中城池宮室大類中土有陰陽星歷醫藥音樂諸技其織文製器尤巧寒暑應候民殷物蕃五穀六畜咸備俗重殺不食豬肉嘗以白布蒙頭雖適他邦不易其俗明宣德

問其使曾隨天方國入貢天方國者卽古筠冲地極  
富庶習回回教其人皆頤碩男子削髮以布纏頭婦  
女則編髮蓋頭不露其面相傳回回設教之祖曰馬  
哈麻者首於其地行教死卽葬焉墓頂常有光日夜  
不熄後人遵其教人皆向善國無苛擾亦無刑罰寇  
賊不作西土稱爲樂國俗禁酒有禮拜寺分四方方  
九十間皆白玉爲柱黃甘玉爲地堂以五色石砌成  
四方平頂沉香爲梁黃金爲閣垣墉悉薔薇露龍涎  
香和土爲之守門以二黑獅堂左有司馬儀墓其國

稱爲聖人塚上悉寶石圍牆則黃甘玉兩旁有諸祖  
師傳法之堂亦以石築成極其壯麗馬哈麻墓後有  
一井水清而甘泛海者必汲以行遇颶風取水灑之  
卽息明太監鄭和使西洋時傳其國風物如此宣德  
後屢通貢然所言玉柱玉地等語誇誕無稽乃中官  
造作外夷繁華情狀以蠱惑世主動其奢念厥後土  
木繁興民勞國弊亦鄭和輩階之厲耳按今中華回  
教處處有之農商仕宦與常人無二惟守酒肉之戒  
甚嚴遇把齋之月日惟一食見星始餐其洗盥用壺

水自上灌下以表潔喪葬之禮與常人少異凡同教者識與不識飲助保衛惟力是視其風足尙至書史所傳沿海諸國奉回教者十居八九皆各成其俗不盡同也

### 天主教

天主名耶穌大西洋人自古不通中國萬厯辛巳有大西洋之意大里亞人利瑪竇者航海九萬里抵廣東之香山澳其教始染中土二十九年入京師作萬國全圖言天下有五大洲第一亞細亞洲中凡百餘

國中國居其一第二曰歐羅巴洲中凡七十餘國意  
大里亞居其一第三曰利未亞洲中凡百餘國第四  
曰亞墨利加洲地更大以境相連分爲南北二洲最  
後得墨瓦臘泥加洲爲第五而域中大地盡矣歐羅  
巴諸國俱奉耶穌教稱爲天主耶穌生於如德亞其  
國在亞細亞洲之中一名拂菻卽古大秦國於時爲  
漢哀帝元壽二年庚申閏一千五百八十一年至萬  
厯九年卒其國自開闢以來六千餘年史書所載世  
代相嬗及萬事萬物無不詳悉謂天主爲肇生人類

之邦其說率謾誕荒渺中它馬堂以其方物進獻有  
天主暨天主母圖并神仙骨諸物禮臣言會典止有  
西洋瑣里國無大西洋真偽不可考且利瑪竇居中  
土二十年始進貢與慕義獻琛者不同所貢諸物俱  
不經乞賜冠帶遣還國勿令居京師不報帝嘉其遠  
來給賜優厚公卿咸與晉接遂留不去於京師宣武  
門內建天主堂堂制狹長上如覆幔傍倚綺疏藻繪  
詭異供耶穌像係彩色平畫望之如塑貌三十許人  
左手執渾天儀右义指若方論說狀鬚眉豎者如怒

揚者如喜耳隆輪鼻隆準目若矚口若聲右聖母貌  
若少女手一兒耶穌也衣非縫製自頂被體所供香  
燈帷蓋無不修潔精美利瑪竇於庚戌年卒以陪臣  
禮賜葬阜城門外自是其徒來者益衆

### 艾儒略

艾儒略者著職方外紀其言曰天主化生天地肇育  
人類欲身自降生啓萬世升天之路後果降於如德  
亞曰德稜之地名曰耶穌譯言救世主也在世三十  
三年有宗徒十二人耶穌縱天之能不假學力通各

國語言文字耶穌肉身升天諸弟子分散萬國宣揚  
教化能令瞽者明聾者聰啞者言跛者行病者愈死  
者生又能驅妖邪逐魔鬼從之可升天堂永脫地獄  
一切大小過惡惟天主能赦宥之非誦經施捨所能  
贖故初入教必先悔罪次解罪婦女入會者另居一  
處惟父母得暫往見男子例更多端凡學者尊敬十  
字聖架或懸掛胷前必獲福報云云其誕妄無稽大  
抵獵莊列之荒唐竊釋老之餘緒逞其私智肆無忌  
憚就耶穌年歲論利瑪竇云一千五百八十一歲何



其壽艾儒略云在世三十三年何其促此矛盾之大者

### 王豐肅

王豐肅者居金陵專以天主教惑衆小民信之士大夫亦爲所誘誇言其國風土人物遠勝中華禮部郎徐如珂惡之乃召兩人給筆札令各書所記憶悉舛謬不相合丙辰如珂與沈淮晏文輝合疏糾其邪說惑衆亟請驅斥帝納其言遣令豐肅龐迪我等俱赴廣東聽還本國命下久之遷延至戊午年迪我等始

去豐肅等復變姓名至金陵行教如故蓋其人東來  
本意專在行教一時士大夫徐光啓李之藻輩首好  
其說且爲潤飾文詞故中土多染其教云

專鄉贅筆言日本國遭天主教之害痛絕西人設法  
嚴禁而其教流入中國迄今二百餘年惑人不少特  
以時當 邳治未敢甚肆然爲風俗人心之害不淺  
吾鄉無習此者未得其詳相傳願入教者其師令服  
清水一盂輒改其常度乃予之白金五十兩故投者  
甚衆其歸也必令家人毀祖先牌位竈神門神之屬

而專奉十字木架甚虔遇物作十字形者卽不敢褻  
越所奉經典聞亦不甚異惟奉教者物故其師輒遣  
兩人至屍旁啐經以布掩屍親視殮訖始去或以爲  
竊取兩目瞳子故也特不知竊之何用殆西洋鬼工  
諸物有需此乎相傳嘗有人貧甚稱貸無所諭知入  
天主教則可得五十金乃預戒家人俟得銀而歸必  
灌以藥物使吐家人領之後其人受教歸果欲毀神  
牌奉十字架家人如戒繫其手足以藥灌之良久乃  
吐始惟清水最後一血團湧出方止其家人將血團

貯於水盆經宿血散中有一物不散乃成人形鬚眉畢具細視其狀卽授教師也方今

令甲至嚴習其教者法無赦有司推勘第取十字架令罪人跨之跨者以悔過議減亦竟有甘受刑誅不願跨架者

### 西洋厯法

西洋人之得留中土亦非無故其人率專精厯法萬厯三十八年十一月朔當日食厯官推算多謬五官正周子愚言西洋歸化人龐迪我能三拔所攜厯書

有中國載籍所未及者當令譯上禮臣翁正春請仿  
洪武回回歷科例令迪我等會同測驗從之迨迪我  
等去後至崇禎時厯法益疎舛允禮書徐光啓之請  
令其徒羅雅谷湯若望等以其國新法參較開局纂  
修書成以崇禎元年戊辰爲厯元視大統厯爲密蓋  
其人自入中國參考中國諸書法益明備纖毫不爽  
至今 欽天監猶用其人不能盡去然不去則傳教  
終無已時如令士子一體明習厯法有厯學精深者  
量予登進之路則中土士人知厯者多西洋人失所

恃矣昔唐宣宗欲裁抑宦官令狐綯曰有罪勿捨有  
闕勿補自然漸耗至盡可師其意西洋人薄其廩祿  
重其防閑嚴傳教之罪去者聽之來者拒之使之利  
少而害多則其人不去而自去其教不絕而自絕矣  
此特臆說今道光六年欽天監副高守謙呈請終養  
畢學源衰病均奉

俞允准回西洋本國不必再行來京著督撫委員護  
送毋任逗遛與人交接滋事等因欽此從此西洋人  
日少習天主教者亦日少矣

習天文

或謂中土士人習天文者少非西人不可余聞西人  
測算本於周髀自中土失傳西人改易名目來售其  
術是西法卽中土之法耳近世如宣城梅氏尙矣他  
如餘姚邵子政昂霄通中西之術推測布算細析毫芒  
手製儀象西人服其精巧著有萬青樓圖編援引最  
爲精密嘉慶年間又有金陵女史王貞儀者字德卿  
適宣城梅子文木枚其所著象數窺餘星象圖說歲  
差日至辯疑盈縮高卑辯黃赤二道辯地圓論月食

解地球比九重之天論歲輪定於地心論日月五星  
隨天左旋三論勾股三角解等書皆足與梅氏相發  
明巾幗且然何況士類吾友陳君鴻業夙精天文歷  
算其所論著久爲大人先生推許由此觀之不患中  
土無材也

附 毀西洋堂

雍正九年閩浙制府李公衛毀西洋天主堂改建  
天后宮碑記略云自利瑪竇入中國迄今幾二百  
年浸淫沉溺惑其教者未必一旦豁然有悟卽悟



矣或以爲不妨存而不論是其得罪於天而爲害  
於人心風俗者卒未大白於天下也夫教稱天主  
是風雲雷雨陰陽寒暑彼皆得而主之也不知未  
有天主之前將竟無有陰陽寒暑風雲雷雨乎抑  
別有主之者俟天主出而授之柄乎其謬一入其  
教者必先將本人祖宗父母神牌送與燬棄以示  
歸教之誠不知天主生於空桑乎抑亦由祖宗父  
母而生也況人之所以敬天奉天者以天實能生  
人生物耳今以生我之父母祖宗而棄絕之不知

尙何取於生人生物之天而敬之奉之其謬二棄  
絕父母祖宗者欲專其敬於天主也然聞西洋之  
俗亦有君臣有兄弟朋友且生生不絕則何不盡  
舉而廢之而所以事天主者尤專且篤而獨父母  
祖宗棄若敝屣其謬三西洋之教一技一能務窮  
思力索精其藝而後止設未及於精而死則舉而  
授之其子脫其子猶有未就則復授之其孫或一  
傳或三四傳其藝始精則羣然推奉以爲可以行  
教之人矣今之入中國者悉此類也夫一技一能

原無常於生人日用之重至於奇技淫巧尤爲王  
法所不容今旣不知有祖宗父母則爲其祖宗父  
母者當亦不復以子孫視之獨至奇技淫巧父忽  
念其爲子而不啻箕裘之授子忽念其爲父而不  
啻堂構之承其謬四藝旣精矣遂可出而行教矣  
夫旣祖宗父母之盡棄其他漠不相識之人復何  
關欣戚而必窮數世之精力以利他人之用其謬  
五然此雖足爲人心風俗之害然弊止及於惑其  
教之人其罪猶小若其居心之險則尤有大不可

問者西洋去中國數千萬里又有大海風濤之險  
去故鄉離妻子跋涉而來以人情論必有所利而  
爲之故攜帶土物造作器用其誑中國之金錢誠  
不可數計乃聞入其教者必有資給人有定數歲  
有定額勞心焦思取中國之財而仍給中國之人  
圖利者恐不若是拙也或云每紅毛船到必廣載  
其國中金錢以濟其在中國行教之人或又云彼  
來中國者皆善黃白之術以彼國之金錢而用之  
中國夫以此數人之行教而國中居守之人肯傾

貨以佐其用則其所圖者非利也彼既以教惑人而復借黃白之術以要結人心是其設心殆有在矣或又曰彼其志欲行教耳好名之人能讓千乘之國何難去故鄉離妻子蹈不測之大海以博後世之名夫好名之人或有捨其身以徇人者然一人好名何爲盡一國之人皆好名而傾貲以佐之也且絡繹而來其居天主堂者所在而有抑何好名者之多也此蓋非無所爲而爲之者一見其技於噶爾巴矣再見其技於呂宋矣又幾肆其技於

日本矣爲行教計耶抑不爲行教計耶且愚夫愚婦未有不以禍福動其心者今日本於海口收港登陸之處鑄銅爲天主跪像抵其國者不蹈天主像則罪至不赦夫旣爲天主之主而受海外一國如此蹂踐毀蔑卒亦無如何其不能禍福人明矣所精者儀器而璿璣玉衡見之唐虞矣所重者日表而指南車周公曾爲之矣所奇者自鳴鐘銅壺滴漏而漢時蚤有之矣所駭人者機巧而木牛流馬諸葛武侯已行之鬼工之奇五代時亦有之是其

說不經其製造亦中國所素有其爲術又不能禍  
福人吾不知何爲而人之惑之也碑文甚長節錄  
關天主之說如右

長崎略

日本國在朝鮮之南琉球之北古倭奴地或言其人  
中年輒陰痿痿呼爲倭儂呼爲奴倭奴之義取此所  
轄對馬島迤東七十二島皆其畛域史稱其有五畿  
七道一百十五州五百八十七郡而與中國通貿遷  
者惟長崎

崎亦一作壻

一島自廈門往水程七十二更更凡

六十里乘南風至米糠洋香蕈洋望見薩摩島之天堂山方合針路曰糠曰蕈者乃水沫水泡之形似也自乍浦往止三十六更然長崎與普陀東西相向經由五島海水橫流風浪險惡諺云日本好貨五島難過是也薩摩近琉球與溫州對峙對馬近朝鮮與登州對峙二國聘問從二島轉達其國君居長崎東北千餘里名彌耶姑乃國都也封肇自漢至唐又征服之君襲中國冠裳人習中華文字讀以倭普通文藝者爲高士優禮免徭役官皆世祿猶以刺史千石爲



名祿厚足養廉卽街官微秩亦歲給膳米五十包故  
鮮貪墨子奪之權乘於將軍而其君不與焉但受供  
獻奉祀事而已眞可謂祭則寡人也開國以來其君  
王姓世守虛器將軍不敢篡奪相傳曾有篡者國中  
陰陽爲災五穀物產悉不登君臣復故卽順若如初  
噫島夷蕞爾名器尙不容謬假若此哉其國立法重  
不輕爭鬪無盜賊鮮訟獄犯罪者令剖腹自殺不緣  
坐妻孥上下之分最嚴呼童僕鳴掌卽應然無鬻身  
者傭滿卽歸名曰守番俗雅敬祖掃廬墓以時尤信

佛法尙中國僧僧有二派居唐僧寺者守戒律不茹葷居日本寺者聽娶妻不禁葷酒士大夫庶子及無爵可襲者往往爲之其妻亦多世族不爲病史稱西藏僧有娶有不娶倭頗似之倭性好潔街衢日糞除夫婦不共盤匱餽餘之物奴僕尙棄之諺稱不潔爲倭子殆反言耳坐席名蹋踏眠貧富以此爲差衣皆長領闊領男女俱露胸赤足所曳草履名十九文男子束帶插刀皆髡髮薙頂雖下體亦薙之惟兩鬢留髮寸許直至後枕面前挽小髻髮長則修之有職人

穿褲如裳插雙刀婦女衣長曳地染畫花草文彩下  
體裹以紅紗名曰花甲馬足穿短襪以曳履首不戴  
鮮花簪珥惟插玳瑁鬢髮如雲塗以丁香油日事梳  
洗薰灼沉楠髻挽前後爪甲無痕惟恐納垢旣嫁則  
黑其齒睂目肌理雖未足較勝中華然非諸夷所能  
比見客重禮貌對華人亦好談孔孟獨不知貞節爲  
何事帷簿皆不可問夷之爲夷其在此乎人皆複姓  
其單姓者乃徐福配合之童男女也福所居地名徐  
家村其家在熊指山下嚮疑徐福之事荒唐難信孰

知數千載後種類猶存遺型無恙乎以祖龍威虐而  
爲福所愚迄乎一去不返亦付之無可如何福之機  
智殆出李斯不韋諸人上矣薩摩島人多獷悍器械  
犀利且產馬明代倭患皆其人也聞其初漁者十八  
人飄至浙境內地奸民亦髡髮薙頂引之刼掠倭焰  
遂熾故江浙有假倭子之諺迨倭平歸國伏辜者亦  
十八人可見倭患初起特探囊拊篋者流使朱紉張  
經諸公得覓其用殲除易易徒以巨奸擅國易置乖  
宜一任眞假諸倭狼貪豕突爲東南害者百餘年可

慨也已日本市舶明初許通中國後以倭患申禁然其地素產金銀磁漆藥布海味之屬皆可佐中國所不足而紅銅最旺尤鼓鑄所必需故商舶不能禁絕今之客日本者皆採辦洋銅官商也倭通稱華人爲唐人稱商舶上下爲公司惟舶主則稱仙都於長崎島設唐人館聚寓其處環山築城巡邏甚密唐人言語憑通事轉譯呈頭目長崎大頭目曰高禾王交易有官主之通計終歲之利按執事戶口均分以資食用蓋長崎不產米粟故也倭性貪鄙其罔利無所不

至而色蠱爲甚有街管者專收厝館夜合錢其餘市  
買食物約十取其三名爲科羨地多僧寺春月唐人  
每出館往五寺看花肩輿之制與中國檻車相類兒  
童常塞路索銀皮卽戒指也呼街爲町有寄合丸山  
兩町妓樓鱗次七十餘所惟下筑中筑引田爲大大  
樓二十餘人小樓半之稱爲受祿私有通華音能崑  
調曲者女年十三四卽賣入妓樓其從良遣嫁以二  
十五歲爲限未破爪以前衣必長襲至梳梳後去之  
謂之剪襲幼而服役長卽繼其衣鉢有名籍街官主

之登籍曰印番近樓茶屋二十餘所花木蕭疎陳設  
精潔與秦淮河房相埒乃富人設以收租者日晌午  
諸樓皆薰沐豔妝以俟謂之安燈番狎遊者先至茶  
屋指喚某樓某姬其鴛卽引之來見俄而金尊華燭  
珍錯雜陳垂髮雛姬當筵歌舞柳嬌花活觸處泥人  
定情後卽昇入唐館如琵琶瑟焉溺於是者往往沉迷  
忘返流弊所不忍言人惟知彭河道險落際堪虞孰  
知無底之谷不在彼而在此乎吾鄉陳丈養山有記  
有詩賦錢丈禹門有花史有竹枝詞道其間見最詳

茲綴崖略而已

淡水

海水皆鹹故海舶皆有澹水艙涓滴不妄費葦鄉贅  
筆載高麗使於京師窮市得古鍤條識爲神禹定水  
帶投之海水立化甘泉云云其事眞僞難考今以客  
海洋者言海水惟面上數丈潮汐往來者味鹹其下  
俱屬淡水近時海舶上俱置探筒設有機關閉蓋鎚  
至深處啟蓋灌滿淡水仍閉蓋拽上得水甚甘故近  
來海舶無水竭患雖眞有定水帶亦可廢矣



烟瘴

滇黔百越夙稱瘴鄉大抵皆深山窮谷人跡罕到陰翳鬱積之氣結成今承平日久人物蕃庶開墾日多而瘴亦漸輕漸少矣有廣文陶君言瘴無形者輕而難避有形者重而易避嘗在滇乘馬行山中忽見數丈外有五色雲彩飄颺而來從人知爲瘴卽俯地擎土成窪以而伏之陶在馬上不及避策馬疾馳瘴在腰下過因不爲害凡瘴多處男人皆色黃腹大壽亦不永婦人則光華美好倍於他所牲畜尤腴壯蓋瘴

乃陰物故婦人牲畜不染也

自鳴鐘表

鐘表來自海洋其上下立側輪盤及擺鍊等物乃竊中土水碓桔槔之製而變通之無他謬巧且時刻須日晷較定非鬼工所能辦惟以法條易滴漏水壺頗爲簡便乃鬼工所辦也唐張鷟朝野僉載云則天如意中海州進一匠造十二辰車迴轆正南則午門開馬頭人出四方迴轉不爽毫釐此時辰表之始元順帝自製宮漏高六七尺藏壺其中玉女捧時刻籌時

至輒浮水而上左右二金甲神一懸鐘一懸鉦夜則  
神人按更而擊遇子午時飛仙六人能耦進復退云  
云今鐘表法皆本於此特約而小之耳古之機衡無  
論已若記里鼓車已足與鐘表頡頏至張平子候風  
地動儀如有地動尊則振龍機發吐丸尋其方面知  
震之所在古人神巧直與造化相通豈鬼工所能測  
識乎

麒麟

聖王之世麒麟遊於郊藪尙矣周衰獲麟孔子致歎

後世史冊麟瑞屢書大率時非邳治無足歸美明永  
樂十九年中官周姓從阿丹國市得麒麟以歸史載  
其狀前足高九尺後足高六尺頸長六尺有二短角  
牛尾鹿身食粟豆餅餌他如榜葛刺麻林等國貢麒  
麟者非一皆非中土所產以人力致之成祖謙讓不  
敢居以爲瑞最爲有識迨天啟時山東產麒麟巡撫  
李精白圖像以聞輔臣黃立極輩票旨云厥臣修德  
故仁獸至其誣罔固不待言但熹宗童昏繼世奄人  
亂國麟亦何爲乎來哉張子明珩有言曰神以知來

不追既往禎祥先見而後廢興從之敬考我

朝肇基王迹天啟間已戡定瀋陽遼陽諸處瑞應之  
興良有以也順治辛卯年三月山西平定州麒麟生  
是日有五色祥光纏繞牛身遂產道旁徧體生鱗四  
足有甲又康熙十七年江西袁州府山村牛產麒麟  
並見萑鄉贅筆

### 鳳凰

蔡條鐵圍山叢談載博白有遠村號綠含高山大水  
人跡罕到村民自誇我山多鳳凰其大如鵝率居大

木之巔穴木而巢焉遇天氣清明必出出必雙飛所  
過則諸鳥俯首斂翼不敢鳴者久之條歎爲眞鳳凰  
按山海經謂丹穴之山有鳥名鳳皇博白之山豈卽  
古之丹穴乎王漁洋隴蜀餘聞云粵西多鳳皇峒中  
蠻女緝以爲裘甚麗南恩州人截取其嘴爲杯曰鳳  
凰杯是蠻方直凡鳥視之矣徐季方見聞錄載順治  
辛卯秋有大鳥高三四尺許色青集澈浦龜山之麓  
衆鳥萬計翱翔左右七日而去明年青州亦有巨鳥  
來自海上羽備五色從鳥如之皆鳳凰也蓋三代以

前輿圖未廣故但言來儀而未能言所來之地近世產鳳之區已入版圖故來儀屢見然前史猶大書特書惟我

朝一掃前代符瑞陋習雖鳳凰屢見不聞有臣工表聞也此其所以爲郅治歟

獅

一日後覩近代如竹步阿丹忽魯謨斯土魯番撒馬兒罕魯迷哈烈黑婁失刺思亦思弗罕諸國皆常入貢明永樂中哈烈貢使言獅生於其國之阿朮河蘆

林中初生目閉七日始開土人於目閉時取之調習其性稍長卽不可馴矣其形似虎黑黃色無班首大口廣尾尖聲吼若雷百獸見之皆伏地與圖繪所傳不盡合宏治中土魯番貢獅閣臣劉吉言養獅口用二羊十歲則七千二百羊矣守獅日需校尉五十人一歲一萬八千人矣若絕其餵養聽其自斃傳之千載實爲美談帝不聽傳聞我

朝康熙十七年五月西洋度爾都加利亞國貢獅尤悔菴賦云如彪有形似麟無角昂首仰鼻尖耳圓目



廣臆脩尾鋸牙鉤足茸毛如斗正色如鏃云云施愚  
山先生擬應制詩云

聖朝惟尚德薄海必歸王却貢安殊俗獻珍來遠方  
游麟常在野彩鳳已鳴岡

御厯兼三重乘時集百祥旅獒誇往事神獸致遐荒  
問產從鳥弋盤山過白狼尾張逾斗大力勁作虓強  
雄骨毛辭駁金精色受黃吞貔憑掉舌擊象直穿腸  
脰挾奔雷走晴搖駭電光名徵博物志賦賴永興祥  
踐踏翻林麓羈縻自漢唐

皇圖寬覆載異國勇梯航玩好知無益懷柔道不忘  
吼聲驚虎殪騰勢想龍翔檻制蠻奴苦途經西域長  
天顏時顧盼禁苑

命詩章位置分熊館威稜壓豹房依仁靡啖噬展力  
窘飛揚驅戰殲犀兕鳴鑾媿躡蹻修牙鋸似鋸厚義  
密爲裝率舞隨

天仗馴心習

帝鄉休徵將玉馬靈族又神羊服猛餘鴻略君看靖  
海疆後

秋獮名獅搏得兩熊一重千餘觔一八百觔老獅力  
盡而斃其所生之子因解所帶鐵球逸去是夜卽出  
關

### 燕窩菜

爲海錯上珍舊傳產柔佛國今閩廣貨者不盡自柔  
佛來也王世懋閩部疏云海燕所築銜之飛渡翻倦  
則擲置海面身坐其中久之復銜以飛陳懋仁泉南  
雜志云遠海近番處有金絲燕毛如金絲臨卵時啄  
蠶螺以食土番云蠶螺背上肉有兩肋如楓蠶絲堅

潔而白可補虛損已勞痢燕食之肉化而肋不化嘔  
出結爲小窩附石上燕雛能飛海人拾之故名未知  
孰是

### 葛仙米

當湖陸武園

補

舊粵西偶記云勾漏山道書謂之寶圭

洞天洞口前後產葛仙米採而乾之粒圓如黍黑色  
以之揉麴釀酒特芳香今肴饌多用之可稱逸品無  
有能釀之者相傳乃稚川丹渣委棄而生然乎否乎

### 人面豆

產滇省一苞數粒宛然人面也小兒服之可免出痘  
臨痘時服之危者可安彼地亦甚珍之不可多得有  
表戚游滇帶回三數粒色白大小如扁豆江浙間曩  
有豆作人面之異說部家以爲兵戈預兆意亦與此  
豆相同特少見多怪耳

阿魏

阿魏中國絕少多以蒜膏僞之諸臯載波斯國阿虞  
長八九丈皮色青黃三月生葉如鼠耳斷其枝汗出  
如飴久而堅凝名阿魏本草從之近有客自滇中來

乃言彼處蜂形甚巨結窩多在絕壁垂如雨蓋滇人  
於其下掘一深坎置肥羊于內令善射者飛騎發矢  
落其窩急以物覆坎則蜂與羊共相刺撲二者合併  
而化久之取出杵用是名阿魏明史撒馬兒罕西去  
五百餘里有沙鹿海牙國地生臭草高尺餘葉如蓋  
煮其葉成膏爲眞阿魏

椰瓢

產西洋古里國其地富家多植椰子樹其嫩者漿可  
飲亦可釀酒老者作油糖亦作飴榦可構屋葉可代

瓦殼可製杯瓿可索綯煨爲灰可鑲金

伽楠香

伽楠香一名奇楠嘉善徐季芳岳聞見錄載日本國

取伽楠香法先期割牲密卜有無走密林中聽樹頭

小兒語急砍數斧而返遲則有鬼搏人隔年始一往

先上其王次及三僊

音馬日南貴官

厚酬其值次者聽別售

明史云奇楠香占城國有之酋長遣人守視不得采

犯者斷手足中國多以沉香僞之

廣東冰

福文襄奉

命廣東時方盛暑沉李浮瓜鼓以風扇猶揮汗如雨  
蓋地氣本熱又當盛夏也公偶云此時都中有冰得  
此則合室清涼惜南方不可得耳傍晚屬官送冰至  
大塊高數尺傍有小冰數塊承以水盆供諸座中覺  
有涼意公樂甚歡飲良久始寢次早其冰依然不化  
分寸蓋水晶也



野語九

伏虎道場行者編

語餘目次

并引

僕自壬辰輟耒曠逾一紀中更多故衰病頽唐  
無復怡情翰墨偶得奇聞逸事往往筆之於書  
歲月既久哀然成帙瑣碎蕪雜更無體例可問  
屬家弟選泉去繁存簡聊資譚助語餘  
道光甲辰長夏星甫自識時年七十有六

蘇公祠

擇勝亭

飛英塢

顧渚茶

浚淩

山洪

伐蛟

山棚

木蘭考

韓貞女

闢邪畧

毀天主堂

程城固

大王廟

祠山

太素脉

還難婦

徐繹堂

戴觀察

蔡鴻臚

還遺券

家貞女

費總兵

腹疾二則

夢蘭

蝦人

待時

姚楹帖

野語九

語餘

蘇公祠

蘇文忠公於元豐二年自徐州量移吾湖四月二十  
日履任時新法方厲公不能違第因法便民所至民  
皆德之有何正臣者迎合章呂據公謝表知其愚不  
適時難以  
追陪新進念其老不生指爲愚弄朝廷入告而舒直  
事或能牧養小民二語  
李定李宜之輩詭襲沈括故智將公刊布詩文籤說  
進上稱爲謗訕奉詔逮問臺吏皇甫遵於七月二十

八日抵郡公怡然就道惟子邁步隨王適王適陳師  
錫餞送餘皆畏避計蒞湖將百日耳乃公去後民間  
爲作解厄道場累月今城南尙有蘇臺蘇灣東坡書  
院及黃龍洞蘇公祠其遺愛何遠也峴山舊有九賢  
祠文忠與焉頽廢已久奚君榆樓常與同人論吾郡  
賢守詩文非盡人能習惟蘇集雄奇富贍士林家有  
其書且公詩文章疏惓惓於茗溪風土浙西水患者  
指不勝屈况峴山尤公屢經游賞之地乃嚮乏專祠  
無以奉瓣香薦秋菊非闕典耶道光戊戌歲郡人葺

峴山之顯化寺榆樓成勞不薄遂於寺左闢屋數楹  
爲蘇公祠且與同志購備器物是冬部署完整十二  
月十九日值公誕辰約同志十二人奉安栗主奠醴  
祠下各賦詩紀事已亥以後俱於四月二十日舉行  
與會者多至二三十人分韻之作積成卷冊歲有增  
益余不文幸隨諸君後謹誌其緣起如有與會者題  
名卷內茲不具錄初戴君銅士取公詩南郭清遊一  
聯作楹帖已爲雅切後釋覺阿祖觀作聯云名宦重  
吳興墮淚今成兩峴首祠堂遍寰宇化身何止百東

坡尤妙惟祠宇尙隘增崇改觀不能無望於有力者

### 擇勝亭

東坡先生在汝南有擇勝亭記其製雖未詳大要以竹爲梁柱若瓦若垣皆以布爲之而四隅施繩櫪以張之略如帳房之法遇勝地高會而有寒風烈日則隨處可設且卷舒甚易取攜甚便所需人力無多吾鄉多佳山水凡舟楫可通之處無需乎此若山深景邃而無休息茗飲之所不能往遊卽遊之亦不暢適宜師此意製一亭一幔以備擇勝而施其精狹廣狹

隨物力之豐嗇爲之實濟勝之美具今峴山蘇公祠  
祠宇不寬未能攬湖山之勝另建之舉遙遙莫必不  
若仿此構備布亭屆期擇勝安設奉主致祭旣于文  
忠爲宜而需費不多資用甚廣同社諸君或不以余  
言爲謬

### 顧渚茶

俞劍花云言茶者必推顧渚其地在長興界中吳小  
匏刺史未通籍時與數友爲碧巖之遊過一山家竹  
籬茅舍幽潔特異主人延客入淪茗以進瓷甌精好



揭蓋視之碧花浮動清香襲人佳茗也方興復進俄而長鬚奴提一紫沙宜與壺置几上客竊笑其遽易粗品而主人起立另取小杯手斟奉客意甚殷勤受飲之甘回舌本珍勝頭綱覺陸羽盧仝品題猶未盡也異而問之則曰頃所進雖佳不過產於高山摘自雨前者茲則真顧渚茶也生於高嶺絕巘人蹟罕到之處吾每歲春仲倩人採而藏之亦不可多得滿座贊嘆不已瀕行小匏乞少許以歸粗枝大葉絕不作二旗一槍之狀而味佳特甚此中人清福不可及也

飛英塏

郡城南西北三面皆山惟東北一隅獨嫌低空唐中  
和四年僧雲皎建石塏於其處然後形止氣蓄倪文  
節公所謂一郡砥柱也宋開寶間外罩木塏三十七  
層高六十五丈紹興庚午熒於火沂王夫人俞氏捐  
貲重修損三十層高亦減半後屢圯屢脩俱詳郡志  
嘉慶壬申秋有僧來郡徠升塏頂燃燈四照里人不  
以爲意癸酉六月二十二日丁巳大風雨塏尖銅頂  
傾落壓損觀音殿三楹壓斃皮匠一人相傳嚮有辟

風珠及他寶物鎮之至是羣疑被燃燈僧竊去或曰僧將鐵鍊鋸斷以致傾圮二說皆非無因塢圮之後頻年田蠶屢歉民間生計日蹙科第亦漸寥落道光丙戌歲姚文僖公文田謀募修塢引寄郡未幾公歸道山事遂冰擱癸巳乙未郡中紳士兩次建議興復募捐二萬餘金雇匠興工至戊戌竣事是年卽有鈕松泉福保大魁之應己亥春並將道場之多寶碧湖之浮玉兩塢同時修葺完整厥後年穀順成而春秋兩榜獲雋者遂復舊觀餘詳三塢徵信錄

浚溝

昔賢謂吾郡有水之利無水之害以有太湖爲歸也  
今大不然蓋水之趨湖必由溝港溝港不疏則水洩  
不暢而泛溢爲害矣至太湖容納諸水以有海可歸  
也今湖之下流淤淺者多故湖水之去不速而易於  
倒灌矣遂古未能詳考溝港之名似係起於吳越錢  
氏置撈淺軍分四部凡七八千人沿湖爲溝溝有斗  
門門各插板旱則閉之以蓄水灌田澇則啟之以洩  
水入湖此治溝之初也宋紹興間知湖州事王回修

七十二漚及各閘迨後屢興水利不專漚港明天順  
間伍餘福上三吳水利論言烏程長興共七十三漚  
大者如溪小者如澗塞者如陸沉通者如神漢湖塘  
皆有桑麻蘆葦之屬民之利其業者憚於疏浚無怪  
乎漚之者有湖而洩之者無漚也萬厯四十二年巡  
按李行令開浚湖蕩並築塘壩寓賑於工烏程令楊  
國楨議除陳漚等十七處深通不計外將楊漚等十  
九處濬流疏源築缺補壞陸續完修我

朝康熙雍正年間東南水利屢厯

宸衷至雍正七年動帑修浚溲港並及間座乾隆十  
九年湖郡大水爲災李肯庵太守堂屢請上臺疏浚  
溲港緣太湖下游境隸江蘇事權不屬因循數載至  
二十七年莊中丞有禁自浙調蘇浙撫熊中丞學鵬  
與會奏同時興工李太守遂按畝計工富者出資貧  
者食力趨工踴躍兩月歲事計浚溲六十有四水患  
稍息士民誦之嘉慶五年阮中丞元曾勘太湖諸溲  
欲行疏浚因必須先浚吳江長橋多所格礙蘇省仍  
復議寢道光三年大水爲災雖蒙

恩蠲賑並施而民困猶甚郡人凌君少著名介禧聞有  
三侍御條陳水利且上臺有以工代賑之議遂上書  
帥中丞承瀛擬呈水利事宜十四條頗見採納令凌  
君協全委員親履各漕相度形勢探量寬深丈尺繪  
成圖說上之時以太湖之水以海爲歸疏導之方必  
從海口始工關蘇松湖三郡經費浩大籌款維艱不  
能遽如所請惟先將運河東西石塘興工修完並培  
築各土塘圩岸亦凌君所陳之一要也凌君綜杭嘉  
湖蘇松常鎮七郡水利泐有成書以脩後來考鏡於

吾郡尤詳云茲撮其畧

### 山洪

水利原委淩君少茗論之綦詳然有少茗所未及者則不在水而在山蓋湖境南西北三面皆山接連數郡當大雨時行之際山洪挾土而下色類黃河卽疾趨太湖尚不免隨路停淤况下游不暢趨湖艱澀乎南路來水較清且溪蕩擅魚菱之利簞撈爬刷用力較齊是以水道深通惟西南正西迤北一帶山洪常發爲患最深推原其故有二一由天一由人由天者



發蛟是也俗名泛黃每遇霖雨連綿天氣蒸鬱則蛟常穿山破石而起起必多處黃水隨之衝沒田廬人畜無可抵制惟接著溪河之水蛟水方止蛟亦潛伏不見而黃水浩瀚洶湧滾滾趨下高以丈計數日方清其土停淤不少而水道潛長暗高矣聞蛟卵在下其上草木不生大雪不積故昔人有伐蛟說令於冬令尋掘得之官爲給賞是事雖由天若實力講求患猶可弭由人者山棚是也俗名番薯厰外來之人租得荒山卽芟盡草根興種番薯包蘆及花生芝蔴之

屬彌山遍谷到處皆有草根旣淨沙土鬆浮每遇大雨山水挾土而下與發蛟泛黃無異且發蛟乃一方偶有之事山棚則旁山郡縣無處不有亦無處不多湖郡山洪無歲不發自山棚日旺溪河蕩漾受水處逐漸增高而圩田低窪如故以致水患益大是事雖由人而非人力所能驟遏也鄙願惟望山鄉賢士有心如少茗其人者親歷各處察看形勢如何禁遏山棚如何實力伐蛟則可減山洪挾土之害矣

伐蛟

野語九

陳文恭公宏謀嘗著伐蛟說頒行後亦經大府重刊  
廣布而有司簿書期會之不遑無人講求及此今因  
述山洪之患摘錄其畧 蛟如蛇四足細頸頸有白  
纓本龍屬其孕而成形率在陵谷間乃雉與蛇交精  
淪於地聞雷則入地成卵漸次下達及泉積數十年  
卵大如輪其地冬雪不存夏苗不長鳥雀不集土色  
赤有氣朝昏暮黑上冲於霄卵既成形聞雷聲漸起  
而上地色與氣漸顯而明未起三月前遠聽似秋蟬  
悶在手中鳴或如醉人聲此時蛟能動不能飛可以

掘得及漸起離地三尺聲響漸大不過數日遇雷雨  
卽出多在夏末秋初善識者先於冬雪時視其圍圓  
不存雪又無草木復於春夏之間觀地之色與氣掘  
至三五尺其卵卽得大如二斛甕預以不潔之物或  
鐵與犬血鎮之多備利刃剖之其害乃絕 又蛟畏  
金鼓及火山中久雨夜立高竿掛一燈可以辟蛟夏  
月田間作金鼓聲督農則蛟不起卽起而作波但疊  
鳴鉦鼓多發火光水勢必退

嘗見伐蛟一事地方官假手胥役其弊無窮不免

虛應故事惟在山居有力之家有心之人親厯察看或出資購買蛟卵庶乎有濟

山棚

他處民人或無恒產輒結夥攜眷羣至山中向業主租取荒山租價反倍於買價年限一滿卽棄而之他故租無不得呼朋引類日積日多各省皆有有司稱爲棚民立法禁止驅逐卒鮮成效蓋利之所在多方支吾掩護也其人安分耕鑿固十有七八而逃凶逸盜淫賭鬥狠之徒十有二三馴良者畏其反噬不敢

首告而狡黠者樂其非爲效尤隱蔽黨羽旣衆棄惡  
不作山深易匿破案甚稀間獲一二懲治其未破者  
覩法如故近聞各處搶竊巨案棚匪居多奉文搜捕  
點者聞風先遁追緝捕少弛搶劫如故此地方大患  
但禁戢之方寬嚴皆有流弊安得智者設法解散除  
之以漸乎

### 木蘭考

毘陵宋子庭先生

翔鳳

題木蘭圖附考證云木蘭詩

隋大業間事也可汗謂突厥啟民可汗天子卽煬帝

野語九

十

也黃河蓋水經所云奢延水卽無定河入黃河之處  
黑山蓋卽水經所云黑水出奢延縣黑澗黑澗當因  
黑山名之今陝西榆林縣有黑山黑水出其下卽詩  
之黑山也隋書突厥傳拜染干爲啟民可汗上於朔  
州築大利城以居之又云雍虞閭侵掠不已遷於河  
南夏勝二州之間發徒掘塹數百里東西距河盡啟  
民可汗畜牧地今榆林以西邊牆內外並是啟民故  
地其部落散處其間木蘭當是啟民部落家在黃河  
東故一宿在黃河邊再宿在黑山隋書又言二可汗

自相仇敵每歲交兵積數十年故云同行十二年又  
考大業三年煬帝幸榆林法駕御千人大帳享啟民  
可汗及其部落酋長三千五百人賜物各有差木蘭  
在部落酋長之內故云歸來見天子天子坐明堂古  
巡狩有明堂朝諸侯之事借用之可汗問所欲二句  
當依一本作欲與木蘭賞不願尙書郎不欲官於天  
子之朝也右于庭考證如此

郡人汪君新甫云歸德府志載監察御史張維恕有  
孝烈將軍廟畧云孝烈隋人姓魏氏名木蘭本處子



世傳可汗募兵孝烈痛父老弟幼慨然代行閱十有  
八載人莫識之及凱還天子嘉其功除尚書郎不受  
懇奏省親及還釋戎服衣舊裳同行者駭之遂聞於  
朝召赴闕欲納之宮中孝烈以死拒之帝驚憫贈將  
軍諡孝烈云而人物志又稱隋恭帝時人已相牴牾  
且木蘭從戎一紀久歷風霜約計年近三十煬帝荒  
淫重色未必欲納宮中其說皆不足信俞劍花又云  
直隸完縣卽古曲逆地有孝烈將軍木蘭廟縣志載  
將軍姓魏氏亳州人漢文帝時扈從來曲逆故立祠

祀之其言與歸德志姓氏封號悉同而時代懸殊亦難徵信骨見魏木蘭或另有其人是女與否亦未可知特因古詩一首曲爲牽合耳

### 韓貞女

平陽錄載保軍韓氏女年十七遭明氏珍兵亂慮爲所掠僞作男裝混處民間旣而果被虜居兵伍中七年人莫知爲女後從王珍兵掠雲南還遇其叔贖歸成都嫁於尹氏人皆異之稱韓貞女

俞劍花曰此可配慕雄烈將軍魏木蘭祠余則謂金

野史  
妖堂無雙譜當刪一首奈何

關邪畧

邪教之源起於方士流爲巫蠱至黃巾而邪焰始熾  
唐有劍俠與刺客同亦邪術之一端然未見正史或  
文人游戲故神其術耳若呂用之輩猶巫蠱餘毒也  
宋代方臘以奉魔茹素惑衆煽亂流毒數州厥後邪  
教率踵故智得非當日天書符瑞有以召之耶元代  
番僧與國終始事異而害同迨韓三童起又若與漢  
末黃巾遙遙相應和矣勝國時徐鴻儒唐賽兒之徒

構亂一隅旋就殄滅至焚香等教抑又末也我

國家正氣彌綸羣邪遁跡異端左道不復著靈如川  
楚徐姚諸逆直隸林劉諸逆皆非真有邪術足以驅  
使妖魅祇襲白蓮餘唾創爲紅蓮紅洋天理八卦諸  
名色託詞興教以欺誘愚蒙售其詭詐馴至罪大惡  
極重勞

天戈殲蕪非冥頑之極致耶相傳邪教惑衆率以茹  
素嗟經消災宥罪動人飲財之方視出錢之多寡爲  
來生福報之等差所到之處同教互有攸助故貧者

趨之同教男女姦私無禁故惡少趨之竊劫殺人同  
教互爲容隱故逃兇逸盜負罪不逞之輩無不趨之  
而馴謹鄉愚輕信簧言妄希福報陷溺其中者不少  
兢兢然啖經茹素不爲匪僻而不知身陷刑章者是  
可哀已其引誘爲逆更有術焉古佛降生菩提再世  
因事造端未易殫述大凡人莫不貪生而畏死也乃  
誑之曰一遭兵劫立地成佛故匪夥到官往往直認  
不諱卽誅以刑誅亦無悔意何則成佛之念重也而  
桀黠匪黨逃死狡供何所不至鞠獄者豈不難哉其

抗拒顏行多用新授及褻脅者爲前驅臨發食以湯  
麪餅餌之屬卽持刀奮迅逢人擊刺不知退縮藉此  
詭爲法術豈知所食者用酷烈藥物製成所以如此  
迫藥性一過卽頽然而靡矣川楚

王師或察知其計持以鎮靜待其前鋒氣衰鼓行而  
前如殪孤雛腐鼠凡小說所傳紙人豆馬役鬼驅神  
諸伎倆已絕無矣至邪教經卷嘗於公牘中見郡縣  
搜得呈驗者皆前朝山東羅某所著羅卽若輩尊爲  
羅祖者經多不能悉記有一種名太上巍巍不動深

根結果經寶卷其名已鄙俗可嗤開宗亦引佛經數  
語半頁之後悉十字句俚詞凡所稱引皆淺陋演義  
雜劇中事間作奧語如真空無生等句借以眩俗絕  
無精義可參亦無顯然悖逆字句餘經大率類此若  
輩奉爲金科玉律欺誑愚蒙作俑階厲似應罪歸羅  
某然蒲柳泉聊齋志異載羅祖卽墨人充戍北邊因  
事發憤棄家入山辟穀坐化則其人乃修道有得者  
必不造此淺陋經典惑世誣民意必邪教中粗識幾  
字者託名編造耳然正幸經文淺陋不能欺誑士林

故易起易滅非若二氏之各樹精義可比也惟士林雖不受誑而邪教之欺人誘人未必盡人皆知故就見聞所及質而言之願能文者推廣此意著爲說亦闢邪翼正之道也

楊蕉雨觀察

炳堃

云邪教煽亂誠爲罪不容誅迫破

獲到官從犯內半屬無知愚民蔽觥就死情殊可憫曩官豫楚時曾製俚言告示刊刷成本於因公下鄉時令識字鄉耆對衆讀之因而感悔者不少余得之細讀具見化導苦心示長不及備錄願賢司牧隨地



隨時揭破其妄亦以俚言曉諭愚頑實造福之大端也

毀天主堂

天主之說已詳第八卷今程子翔述其尊甫稼村刺史毀城固天主堂事與前迥異堂在城固東關外鄉僻處愚民被惑者多吏役不免故破獲較難頭目三人首衣藍曰藍臣府次衣黃曰黃臣府又次衣紫曰紫臣府其教以天爲主故稱臣府其冠類古方巾袍則藍黃紫外裼以他色稍子皆異錦爲緣其堂甚峻

廣容千人四面開門中庭深奧室宇環繞路徑縈紆  
悞人者迷不得出率被致斃所奉十字木架高與人  
等沉檀爲之飾以珠貝行教之期堂內鐘鼓鳴諸門  
盡闔奉教者各服其服畢聚堂下焚香聽命頭目按  
冊點名相率登堂向架羅拜步伐止齋肅如行陳拜  
畢頭目登座開講其經大指述天主困苦成道巔末  
講畢衆匪齊聲朗誦各各納錢而退平日不茹葷酒  
凡娶婦先與頭目共寢數夕方歸新壻名曰供奉恬  
不爲恥宰是邑者以吏役掩護因循未發刺史廉得

其實密約武員託他故率帶兵壯千餘人往捕至則峻宇繚垣四門固閉無間可乘有民壯徐智者素勇敢超垣而上餘兵壯疊肩繼登遂開門入刺史率弁兵圍守要隘又選精強兵壯百名進捕三頭目率衆來禦遂獲二人其一遁入內官兵追之忽竄入小門不見恐墮其計命兵壯四門齊進歷數十戶至一室見兩婦並踞於牀面有懼色遂搜獲之餘匪或擒或逸於是將各犯解省按律懲辦爰毀其堂改爲義學云按此說惟奉十字架爲天主教本色其茹素歛錢

則各邪教通弊而非天主教所有至服飾詭異婦女供奉罪爲尤重向聞邪教多託佛老爲名此獨託天主爲名可謂每況愈下矣

語曰稼村此舉妙在不動聲色猝然而發所謂迅雷不及掩耳脫事機不密匪有整備危矣又嘉慶庚申年教匪蒲城稼村先期招義勇練兵壯守禦甚嚴匪知有備不敢犯而去他縣率蹂躪甚慘而城固獨全事平叙勞加知州銜有材若此而年未周甲未竟其用惜哉

程城固

程君稼村雲嘉慶初以孝廉授知縣補陝西城固令  
清操自守聽斷維勤一日坐堂鞠獄忽一牛絕韁疾  
馳追者不能及遏者不能止徑至堂下跪前兩足淚  
下如綫著地不絕君傳牛主訊之緣將娶婦循俗例  
欲宰牛祀神耳君諭以私宰律禁薄懲之誠以勿殺  
牛仍伏不起君曰汝慮終不免乎廼捐俸買之角懸  
銅牌鑄放生字復從紳士請捐入書院耕僦田且申  
明其禁私宰祀神之俗遂革時張公直方總主講樂

城書院撰文泐石紀之

語曰明史循吏傳云新淦謝子襄以青田知縣課最擢知處州府有民鬻牛於市牛逸至子襄前俛首若訴乃捐俸贖還其主與程君事適符而程之處牛尤善其他善政甚夥余特紀其新異者

大主廟

金龍四大王郡無專廟今建於三里橋漕艘所崇奉也考神姓謝氏諱緒宋會稽諸生兄弟四人紀綱統緒神其季也以宋理宗謝皇后之姪爲國戚絕意仕

進隱錢塘之安溪金龍山值歲歉多散錢穀賑飢者  
甲戌八月天目山崩乃泣曰天目臨安主山也主山  
崩宋其殆乎德祐丙子正月宋帝遣楊應魁上降表  
于元三月伯顏入臨安宣詔趣宋帝及全后并度宗  
母隆國夫人黃氏偕庶僚三學生等北行太皇太后  
謝氏以病留五月端宗卽位於福州改元景炎八月  
元人又入宮中昇謝后之牀以去侍衛七十餘人同  
赴燕神日夜痛哭陰結義士圖恢復有詩云莫笑狂  
夫老更狂推輪怒臂勇螳螂三軍未復中原土萬姓

空悲塞外鄉動地聲名懸宇宙驚天氣概蕩邊疆忠  
心自古人人有莫笑狂夫老更狂後知事不可爲復  
題詩於石上曰立志生平尙未酬莫言心事付東流  
淪胥天下誰能救一死千年恨不休遂投長安溪死  
時溪水洶湧其屍逆流而上經旬不仆人咸異之將  
死時其徒問曰先生志決矣他日何以爲驗神曰黃  
河水逆流是吾報讎日也其徒遂葬之金龍山并爲  
立廟後明太祖與蠻子海牙戰於呂梁敵據上流明  
師不利忽雲中有神將揮戈驅河水逆流元兵大敗



太祖夜禱問其姓名夢儒生素服前謁曰臣謝緒也  
憤宋祚移沉淵而死上帝憐其忠命爲河伯今助真  
人破敵吾願畢矣次日封爲金龍四大王立廟黃河  
上逮

國朝而神之聖蹟傳聞互異爰按東都事略本傳暨  
渠齋雜說紹興蘭吉人姑廟記參考如右天啟間勅  
封護國濟運金龍四大王

本朝隆正祀典改封顯佑通濟王後又屢加封號俟  
考

洞山

自長興建廣德諸處廟宇相望稱洞山張大帝二月  
八日神誕祭以雞犬考神姓張氏諱渤字伯奇漢武  
陵龍陽人系出張湯後湯子安世安世曾孫名渤是  
爲神生於新室建武之間具神通能變化發願開長  
興之橫山通津廣德乃化身爲大豕率陰兵入洞從  
事屬夫人李氏致饋以擊鼓爲約一日烏銜石落鼓  
上有聲神出不見餉遽力作不復顧夫人後至擊鼓  
不應攜餉入洞但見大豕驚而出神之施工亦於是

止後稱其處爲聖濟祭牲不用絺以此唐天寶間始  
有封號未詳宋仁宗封靈濟王度宗咸淳二年封正  
佑聖烈昭德昌神真君長子封承烈顯齊啟佑王孫  
封永福侯按神事要見漢書張安世傳唐顏魯公碑  
記宋曹學佺名勝志及程棊三柳軒雜識續搜神記  
諸書小有異同特參考如右

語曰化豕開山之說荒遠難稽然淮南子載禹治水  
時身化爲熊以通輶輶之道塗山氏見之慚而化爲  
石事頗相類聖賢神化之蹟未可以常理測也

太素脉

乾隆甲辰年余重表兄凌朗行案館於城北錢氏有錢禹門者爲凌診脈問以子嗣錢云君必有子然來歲夏秋間命恐不保凌時年三十餘氣體壯健肥瘦適中自問無死理歸家談笑道之次年妻果懷孕時改館沈氏世經堂秋夕自鄰館返齋漏三鼓矣閉戶而卧次早日高未起門徒喚之不應乃毀門入見凌向內卧撫之已殯沈封翁鳴谷盛德君子也聞凌之室人有孕慮驚其胎急以大輜舁之至百方勸慰含

殲如禮後生遺腹子薪傳封翁卽令寄名爲孫哲嗣  
慕堂太守時加周恤遂以成立惟錢君診脈何以知  
凌必有子及次年必死或云太素脈有之今讀德清  
俞劍花孝廉隨筆云太素脈不知始自何人相傳其  
法以心脈爲君肝脈爲臣君臣相應爲貴脈又以左  
右各三部每部分爲十年十年之中分七十二至以  
定人爵秩崇卑年壽長短與陞遷降調之遲速有診  
其父而知其子之休咎診其子而知其父之存亡如  
智緣爲荆公診脈而知元澤登第之類其言皆有成

理而近日醫家精此者少因憶吾鄉徐靜園尙書幼時患瘵幾殆蘋村宗伯憂之後石門某來縣邀其診治卽曰此兒功名富貴過君遠甚瘵何足患哉後其言皆驗殆精於太素脈者與

### 還難婦

德清俞劍花孝廉

鴻漸

云嘉慶癸酉歲滑縣逆匪滋

事有河內生嚮挈母妻商於滑之道口鎮是秋子身歸里省墓至武陟聞警亟反奔已阻戎馬不得前迨蕩平至鎮則故寓已成瓦礫場遍覓母妻不得疑遭

難死痛不欲生或告之曰聞滑城被難婦女官爲安置盡往訪之乃如滑至則母妻仍無耗是時婦女之從難中出而無所歸者官分老少二棚名爲人圈出示招領其法願領者自呈年貌藉貫以從征兵一人作保領一少者必從一老者少者從圈外遙指之不能更易老者可卽就所領之少者詢之或有親人許指名以索或勸生若母妻遭亂無以爲家宜爲鬪續計生不得已然之如法具呈得姑媳二人載歸河內議母其姑而妻其媳將擇吉行合卺禮婦聞之乃雪

涕而請曰君待吾姑媳有恩禮妾亦何辭然尚有苦衷不敢不告妾夫滑縣籍居道口去年夫隨翁商於外未及難計亂定必歸歸必相覓請以半載爲期幸而彙砧重聚必不負恩否則爲君室耳生有觸於中慨然許之且曰吾將復至道口招母妻魂歸葬兼理舊業當順途爲若一訪遂問婦翁若夫姓名居址甚悉束裝遂行既至舊地哭奠畢依所言訪之則其家居不當衝未遭兵燹叩其門見一少年坐而告以故少年泣然起拜曰君真長者此卽我之母與妻也已



野語九

而其父出延之入內隱隱聞哭聲問之則曰向者聞  
亂歸覓母妻不得途遇二婦人爲亂兵所掠憫而贖  
之初無他意父以共處不便擬將媳妻我婦不允故  
泣今旣母妻無恙母侯玷其貞矣彼河內人君與同  
鄉能訪知其家否言未已老少兩婦奔而出一見大  
駭蓋卽生之母與妻也於是始而泣旣而喜終乃兩  
家人泥首向天以爲彼蒼報施之巧有如是也翊日  
生載其母妻歸少年亦同至河內迎其母妻返道口  
後兩家往還較親串尤密云

語曰施愚山先生浮萍兔絲篇序云李將軍部曲嘗  
掠人妻既數年攜之南征值其故夫一見慟絕其夫  
已納新婦則兵之故妻也四人皆大哭各返其妻其  
事已奇至無瑕完璧兩世重圓則惟巧團圓傳奇所  
載姚尹二人事方與此合而傳奇乃笠翁臆造此則  
言言紀實也

徐繹堂

道光辛卯歲余客涇川與昆陵徐繹堂交繹堂年五  
旬家止繼室一子甫六齡藉館穀以資朝夕壬辰春

余返里兩月迫重至涇川則釋堂病矣然症止感冒  
醫者誤投補劑遂不起居停主爲其同里趙厚子先  
生仁基官至湖北廉訪經紀後事捐廉送其喪歸已月餘矣涇  
北有大幕山僧寺幽深其主僧慧若能詩好客仲秋  
時有二三同志往訪之慧若忽曰署有毘陵徐繹堂  
者乎並述其家事若素好者問何由知則曰奇事月  
前有庵鄰農家舉一子生而能言曰我徐繹堂爲涇  
縣趙明府司會計家有青年妻室一子纔六歲云云  
遂大啼不止全家驚愕無措或謂是有邪祟憑之惟

犬血可解其家卽宰黑犬取血塗之遂不復言與常  
兒等聞者多與繹堂交咸欲往視慧若曰其家昆弟  
並艱嗣息今甫得一男復有此異不肯抱示外人遂  
已

戴觀察

德清戴開亭先生 振河少孤貧育於舅氏勵志苦讀  
弱冠補弟子員授徒村塾竭歷聘娶脩脯所入不足  
供朝夕星命家謂先生八字宜於海邦適有戚賀海  
洋乃爲之司會計往返三載囊不加豐是歲爲丁卯

科入省錄遺偶行闔閭間適裏急如厠厠板朽落竟  
墮園溷中滿身污穢赴河浣濯再三假衣履於友始  
歸寓快悒特甚越數日友人強拉赴吳山間步同行  
四人共詣相館卜功名相者曰三君捷音難決獨指  
先生曰君面先有晦紋今則晦紋盡散文光顯露獲  
雋無疑咸疑相士或見墮溷之事故神其說未之信  
也闌後祈夢於于忠肅公詞夢梁上置一算盤其大  
盈咫四圍俱以鐵裹迨揭曉則名列賢書癸戌辰聯  
捷成進士旋授湖北松滋令以經術飾吏治且築隄

扞水民稱爲戴公隄行取入都補祠祭司主政轉屯田員外郎出守郅武大府重其績擢臺灣道宜於海邦之說始驗甫履任循例盤庫見庫梁上有鐵裏算盤大與嚮夢者無異悟爲前定遂引疾未幾卒於官其族孫銅士述

### 蔡鴻臚

德清蔡生甫先生之定方麓先生之族子也乾隆己巳生於舊第其大父在郡城夢人報捷報條但書麒麟人比至家適已得孫因命名曰麟次日有黑橋村

野語九

民來訪生子之事言其村有嫗年八十餘家雖貧而持齋奉佛甚虔前夜無病而歿須臾復甦告人曰吾托生西門蔡家門有狀元及第榜者嫗尋卒特來證之云鴻臚幼孱弱而嗜學不輟因得疾乾隆戊戌夏病中恍惚抵一處棟宇連雲皎如銀闕前二巨柱金龍盤繞中懸碧地金書額曰麟宮正徘徊間有冠雨纓衣青袍者出自稱宮卒曰汝不久居人世矣問何時則曰七月廿八遂驚寤至秋病增劇身重下墜自分將踐前夢夙聞母訓前生有持齋奉佛之異乃取

持白衣觀音咒不止忽戰汗如雨其疾頓瘥至七月  
廿八之期竟無恙占詩自嘲云麟宮官卒頑皮甚賺  
得生人怕死期已亥舉於鄉庚子公車入都寓全浙  
新館又疊夢三生焉初世是男自幼捨身爲僧師一  
老苾芻時與僧侶赴澗覓五色石子相較以紋細色  
多者爲勝其負者罰誦經若干卷年十三遂死乃投  
生爲貧家女既適人夫家甚窶又早寡乃發願修行  
迨篤老而死卽轉爲今生自知會試已過閒步郊野  
望見一樓甚峻有人指之曰樓有仙人姓方能知人



窮達事卽求其人歟門入室之左有梯遂拾級而登  
未及半卽見白哲美髯者出如世所繪呂祖像心知  
是仙卽叩以巾否仙曰巾問何官曰詞林至視學而  
止私願甚慰大笑下樓一蹶而醒是科報罷凡七上  
春官至癸丑入場得鱗字號接題後文思沛然至日  
午三藝已成詩題爲繁林翳薈不知所出就題敷衍  
掩卷小憩聞同號者相謂此蘭亭詩也因憶謝萬詩  
似有此語且歲在癸丑韻限賢字殆無疑矣亟改領  
聯云修禊風懷古流觴事記前時向晚倦而假寐忽

夢見其先子卽以詩稿請正讀至頷聯曰不佳不佳  
不如原稿遠甚醒而疑之竟照原稿錄卷遂捷南宮  
向使不信所夢則大背題旨矣是科大魁爲潘芝軒  
相國世恩同年讌集互述夢兆知相國之祖曾夢麟  
自天降相國乃生而鵠臚適中是榜乃祖亦夢麒麟  
報條又有麟宮一夢且得麟字坐號已非偶然而淑  
配稽希人幼時亦夢一童子於庭中手弄麒麟尤足  
異也乾隆甲寅歲鵠臚以座師石庵相國之命紀其  
夢甚詳鵠臚歿後至道光己亥其族子小帆得原稿

於書肆演治成冊吾友王二樵嘗題云儒臣視艸趨  
丹陛佛媼拈花憶黑橋蓋紀實也惜原稿余未得見  
戴銅士述其梗概如此

### 還遺券

外舅錢翁字守和居郡東之錢村家世儒素課徒業  
醫爲生性好濟人而無力遇貧者延之輒却其酬而  
診視加謹焉乾隆丙午夏附載往南潯售絲於途聞  
拾一紙裹則錢券五十千也私念失此者所關匪細  
乃秘不告人靜坐路側以待良久有人踉蹌來形色

慘沮則遺券者也詢錢數悉符亦售絲所得者證之  
絲庄不謬卽舉券還之其人欲酌給若干翁曰吾靜  
坐久待豈望酬者乎其人感泣崩角而去顧時向晚  
船艙人滿乃坐於船艙旣行布帆轉搶猝不及防爲  
帆脚所擊遂溺於水衆雖撈救而河寬水溜飄淌迅  
疾自分死矣忽若有人曳之行約數里漸達淺處曳  
者已渺乃掙札起立大呼救至得生

語曰翁事事宅心從厚意外災迺宜獲神佑溺水不  
死豈在還券一端耶嘗閱東華錄所載還遺金膺賞

野語九

資者多矣然非自爲表暴有司亦何從上聞乎翁此事數十年未向人道偶遇當日救者始得其概質之內弟梁田信然有善不矜尤不可及

家貞女

貞女道結者族兄菊就公次女也母王孺人生女於彰德叅軍署迨兄宰栢城女已及笄問名者踵至女立志事親終老不願適人家方擬徐徐婉勸然女自是不施脂粉不事華飾丁巳母病則衣不解帶湯藥扶掖悉由躬親不假力婢媼母卒哀毀備至居喪

組後女隨父歸辛酉父卒哀毀如母喪迫兩兄分爨  
女已向老廼奉兩親粟主移住居易山莊督婢媪蠶  
桑甚勤衣布茹蔬人不知爲大令女暇則焚香誦儒  
書於佛經不寓目以爲非不信佛但不解經義誦之  
何益遇僧尼求施必峻拒之告人曰吾所以不奉佛  
者正爲若輩難近耳遇姑姊妹處華腴者則曰吾無  
福以堪此有困厄孀居者則又曰何如我潔身親舍  
之爲愈乎道光庚子秋以疾終年六十有六附身之  
具預自經理若前知者所遺田園遺囑爲父墳祭產

其胞姪河亭等奉其櫬葬於山莊之側

語曰幼時讀國策至北宮女之爲人誑爲千古無匹  
不意於吾宗親見之也

費繼兵

總戎費公名俊郢之菱湖人少孤貧失學膂力絕人  
傭其力以養母然性磊落四壁蕭然不以介意隣之  
朱三貧尤甚或謂其爲竊將縛而送之官公力白其  
無事遂已會歲暮公聞香火祠有窸窣聲燭之則朱  
三也問何事朱曰負累旣深不得已思竊物少許耳

公曰此策何可長乎我曾力爲君辨脫若聲揚則前  
事皆實矣朱曰若得錢千文卽從此逝矣公乃哀銅  
錫器質錢一千助之朱遂他往有相士寓菱湖久告  
人曰貴鎮名區代產英傑我未見其人何哉無何公  
詣相士問休咎相士曰吾願見瑰奇者君足當之自  
此以往漸履亨途不二十年冠頂紅寶幸自愛公曰  
吾以得免溝壑爲幸君何相戲之甚相士曰我非相  
戲亦不索酬君得志後幸毋相忘公雖不深信然不  
能無動於中請於母曰聞舅氏在閩設肆寓過客欲



往投之母以爲可乃竭蹶奉母以行旣至適其舅肆  
事方隆寓客常滿舅洎外祖母表弟三人止卧一室  
今增二人則五人一室湫隘蒸鬱幾不可堪公偶閒  
步見樓後有屋三楹甚軒爽而塵封無寓客問諸舅  
則曰屋有魃常擾客故久閉公請試之舅乃爲給巨  
燭二且掃除設榻焉公明燭以待寂無所見燭將灺  
倦而假寐俄有聲自外至窗遂啟一女側身從窗入  
就燭理髮整衣畢轉身向榻長跪則嫣然佳麗也公  
問汝何妖魅敢擾我寢女曰非敢擾公亦非妖魅特

欲一伸幽憤前此數客無膽略見卽遁去妄傳爲妖  
今見公福厚心慈冀施恩泉壤耳問其所求乃曰此  
宅爲某紳故居氏卽紳妾遭大婦磨折忿迫雖經死  
紳慮氏爲厲聽匪人簒言將棺倒植埋於前進左墻  
之下以致不能托生他去望公切告今宅主掘起平  
塋他處氏銜結九原矣公領之女遂隱次早以見聞  
告舅舅卽命工如所指掘之纔尺許卽見棺之後和  
果係倒埋因起而他瘞自是遂爲吉宅公與母亦有  
安室矣公性本不羈舅爲之謀生計所如不偶時以

鄭氏餘孽嘗有警方募兵乃投爲水師營卒公素壯勇多力儀觀甚偉習技藝步伐泊海艦進退輒勝其曹偶猶未試也偶詣茶寮坐飲忽有豪客頻囑之審視卽朱三也公詰以別後事朱但笑不言轉謂公君旣隸水師應乞差巡哨以圖功名何可自逸公然之方欲邀至所居朱已杳公卽求充巡海卒旣至大洋見盜舶方與先到巡船角官兵不利公立艦首指麾前進駛行如飛餘艦亦乘勢迎擊盜舶披靡遂大勝而歸木管官上其功拔爲千總自是奮志功名媚於

外洋水戰乘間出奇十餘年未嘗敗衄積功至游擊  
將軍一夜人定後忽若有鳥飛墜庭除眎之則朱三  
也各道契濶屏人密語問托身何地朱曰公知出洋  
屢勝之故乎公曰吾亦自疑朱曰我自叨公惠無地  
可容不得已傭於海舶有客復招至一舶則盜也見  
我趨捷過其儕伍因共推重茶僚相見後我告知盜  
黨官兵中有費某習勇絕倫宜避其鋒因俾我在船  
覘覘我見公立艦首卽令轉舵避之是以獲勝後羣  
盜識公神采咸懾公威卽我不在舶亦不敢力拒此

野語九

屢勝之故也方今海宇乂安各盜以次殲擒其有業可歸者皆已悔退徒黨日稀今所餘止五百餘人皆逃兇逸匪游惰無業之輩我亦恥與爲伍將他圖矣我去之後若輩無人指揮羣雄易易時不可失公其圖之所以報公者止此公始恍然遂勸朱投順

皇朝必膺

異數朱曰我已籌之熟矣實有鑑於勝國時徐海汪直之流未敢輕蹈此轍且內外盡如公等何所不然人心叵測一人齟齬則故盜之肉寔足食乎公方

復勸而朱騰身一躍瞬息不見公志恣久之乃整齊  
艦械尅期誓師大舉出洋掃穴擒渠餘匪鳥散閩海  
遂宣大府綜其功保奏入 覲備陳海洋島嶼及盜  
踪出沒在洋擒捕之略詞氣詳明勇而不矜

天顏大喜

賜賚有加超陞福寧鎮總兵官俾鎮守閩疆去家居  
固戢時未二十年也其女鬼之墓公嘗泐石表之後  
相士投謁軍門亦款畱厚贈於是延訪者衆所獲不  
貲自公鎮閩後數十年海疆無警以功名終

腹疾二則

河間福寧縣孫蘭皋大令貴州人道光乙未進士出  
宰是邑甲辰春莅任聽斷勤明輿論翕然忽一日晨  
起恍惚見一少年女鬼忿忿向前陰風襲人毛髮都  
悚噤不能聲女曰若前生姓王曾宰是邑我爲部民  
某氏女因患腹疾出嫁後新郎見之大疑有私胎退  
回母家百方剖辨未信我忿極投繯死母家告官相  
驗若並不悉心推鞠顛預完案致堅白之質銜冤地  
下五十餘載今若復官我邑已控諸府城隍神准與

對簿孫以事係前生茫無省記爲解女曰神明豈如  
若作令模稜從事耶孫曰我爲汝作文表揚貞白以  
釋前憾何如女曰我不爲名孫又曰我爲汝延高僧  
設水陸道場超度何如女曰我不爲利逡巡間有吏  
役導孫及女至廟上座尊神係 本朝服色孫忽憶  
民間相傳河間府城隍乃前守周公遂以庭祭禮拜  
謁神初不遜謝而顏色甚和女泣訴前冤乞令償死  
神曰汝死自盡律無償法惟其不爲昭雪咎固難辭  
但伊託生孫氏世有隱德且天性孝友陰曹所重不



能橫加譴責女涕泣不服神諭孫引退聊贖前愆女  
雖未慊亦不敢瀆訴吏役復如前引回則孫殫卧床  
上已周時矣氣色頽喪退志已決乃自創稟揭直書  
其事屬幕中張香坪湖繕之張託故不允孫不得已  
自縊懷之赴郡至則若有人挾持側身斜行而入僅  
能行禮而坐次形容慘沮不發一言郡守熊公疑其  
中惡方令僕扶掖使歸孫乃於懷中出稟呈上熊公  
閱稟駭然姑遣回寓孫亦不敢回縣上遊旣風重孫  
才又以事涉幽恠不便上聞熊公但爲尋常引疾公

願申報而譚文通告在省同官密陳上臺代求改教  
大府惜其去因改委爲涑水令不使返肅寧孫以冤  
鬼纏繞宦興索然顧二親就養抵直不得已奉檄而  
去不知能久任否也家小園與同官遇孫自述如此  
惜女鬼姓未詳

吾郡儒醫張慕廬千里以內科著其舅氏沈翁以外  
科著沈有女年已及笄忽大腹隆起撫之中有結塊  
儼若私胎問之不承則逼令自盡女自問無他不肯  
就死遷延日久腹益膨脹慕廬適過其家診女脈則

曰此非胎乃患腸癰耳顧無術以治之危矣沈遂悟  
於是用一板橈扶女足踰板橈之兩頭出其不意將  
女腹重踢倒地昏暈其癰內破膿從大小便出不啻  
數斗遂按法療治獲痊

語曰甚矣作令之難也腹有癰瘕與胎何異其顧預  
完案未必無包含善意焉而女之冤憾至數十年不  
解乎甚矣爲醫之難也沈氏以外科名家而親女腸  
癰莫能辨識若非張君診脈得之則女幾含垢入地  
矣可不畏哉

## 夢闌

夢闌首邑人原名奎五父爲邑掾惟此子生而穎異  
美丰儀又善白脩飾翩翩裙屐少年也早補諸生聲  
華藉甚擇聲者踵至而奎苛於才貌鮮所措意惟日  
事治遊媽紅弱翠任意攀折父母不能禁禁亦不止  
適邑左當街演劇街旁有樓婦女觀劇者滿奎往來  
樓前偶有瓜子墮其衣因而向樓仰視適嚴媼攜女  
觀劇憎其頻囑不已嗔曰是少年豈未嘗見女子乎  
奎顏頰而去自是議婚者悉峻拒而私賂媒媼訪所

野語九

見樓上母女嚴媼孀居止此女未字媒乃盛誇奎人品家計媼信之許委禽焉迨迎娶交拜牽錦入房循俗例親揭遮面紅巾忽曰我今已見女子矣衆俱不解氏則憬然知樓前受嗔而報之也猶冀日久或釋前憾乃奎仍宿外舍日間相見不交一語幸氏婉淑滄澗中饋諸事與成婦等而加慎焉無何其父歿奎益肆尤奴視其妻會奎邀友設食戲曰我有饌精好若君家真不堪下箸其友戲翻肉拌得猪毛一莖示奎奎語塞攜拌入厨擲氏首血流被面氏忍痛裹創

而已平日待氏都類此從未一言相較也奎與某甲  
有隙家亦中落乃客遊江淮間數年歸後屢侮甲甲  
恨次骨欲陷之乃賂一少年僕婦授計備於奎家故  
作蕩語以嘗之奎故習於蕩欣然挑之僕婦卽自毀  
其衣拉奎赴縣呼冤縣令宋公瑞金庭詰之婦供奎  
強姦未成情狀如真并及其平日遊蕩與善寫詞狀  
諸劣跡問強姦之証則曰間以內安有人見無已卽  
其妻可証也蓋知奎夫妻不諧或可如志遂召之氏  
肩輿赴質宋公令入內宅見夫人自帶告者入內鞠

野語九

之先問結褵幾年及是否和睦氏答以成昏十餘年  
和好無間問何無生育則曰命也問汝夫平日行止  
以守分讀書對及詰以強姦僕婦狀氏力辯其誣且  
言夫性躁待下少恩此婦作事頗習之輒不遜遂逐  
去是以挾仇誣陷云宋公信氏言又憐奎士類事遂  
解氏歸後不食不語是晚乘間投繯死某甲又以奎  
致死其妻告復有人以訟師告捕之急緣其有交無  
行士類無白之者奎自分家居無寧宇乃逃至吳中  
祝髮爲僧白號夢闌

夢蘭雖削髮披緇而經懺一未寓目不特葷酒自如  
且專以刀筆爲業訟者浼作詞狀輒勝故所入不貲  
率費於狹邪飲博同行者得沾餘瀝無賴子多投之  
耳目衆多易於免脫嘗寓松陵一小庵奴使其僧侶  
僧侶怒逐之次日忽有縣役拘庵僧言有過客儒衣  
冠者來謁呈送僧侶諸不法事鎖拘到縣責三十板  
不知罪從何來迨主僧推詳細訪則金頂靴帽皆夢  
蘭所有特假辭耳然夢蘭早去無從質証矣又嘗渡  
太湖抵洞庭山混諸尼中窺覷婦女有老尼怪而詰



之遂遁歸又跳身至武林託足諸梵剎知者復邀構  
詞狀索金不滿意輒收詞稿嗤之故索必如志無困  
乏患烏程德公者夢闌在家出遊時之舊交也前書  
招之適某甲已故無與爲難者於是還故里然惟訟  
是務往來無常處久之復爲怨家所訐擒捕甚嚴踰  
垣遁去後聞在松陵暴死或云卽當日僧侶挾宿憾  
中之云

語曰嗚呼夢闌天才敏捷舉業外兼擅詞章稍自檢  
束固可拾芥青紫卽跌宕自甘亦不失爲名士乃可

邪其行通跣緇流始終怙惡彼以爲夢闌我以爲畢  
生夢夢也獨其妻嚴遇人不淑猶宛轉脫夫於難旋  
自雉經何其知大義能果決哉可哀也已

### 蝦人

南潯施銘庵道光初館於北柵館僮偶至河畔取水  
瞥見水面一物似蝦長三四寸以手撮起則宛然人  
也耳目口鼻纖毫畢具下體作男形惟身體顏色與  
蝦相似口目皆閉兩手著膝上十指可數置之地僵  
卧不動合市聚觀咸共駭怪恐致他異乃復投諸水

一里言  
順流而去竟不知何怪新齊諧有人蝦謂人體彎曲如蝦也此則蝦而人尤爲創見當問諸深於山經水注者

待時

部曹某性豪侈事必爭勝其嬖妾臨蓐適值凶辰過半日許卽爲次朝而大吉矣乃飲以上品人蓂果近至次白方產然母子俱殞謝在杭五雜俎載一紳子婦坐蓐令忍以待時母子同斃部曹真與古爲徒者

姚楹帖

吾鄉姚文僖公世居府城東北鄉姚家埭明萬歷中  
遷城東居月河文僖自署其宏遠堂之楹聯云宇內  
數百年舊家無非積德天下第一件好事還是讀書  
文僖自明至今世有積累嘗撰先世隱德記載遂雅  
堂文集中